

REGIONAL NEWS

HEADLINES:-

1. Mizoram BJP President Dr. K. Beichhua chuan, Mizoramah BJP chu mipuiin an ngana in an thinlungah a tla na tan hle niin a sawi.
2. Vawiin August ni 24 hi Khawngaih tu pawl (League of Mercy) Pathianni a ni a, hemi pual hian nimin khan Salvation Army, India Eastern Territory pumpuiah hnatlangpui neih a ni.
3. Chief Minister Pu Lalduhoman chuan nimin khan Ramchhunga thilsiam chhuahte pho chhuahna hmunpui- PM Ekta Mall Aizawl Chawnpui venga sak tur lung phum a phum.
4. Prime Minister Narendra Modi chuan nimin khan India rama private sector leh startup-te (bul tan tharte) chu kum tin rocket 50 kahchhuah tumna neia hma la turin a ngen.

<><><>

BJP

Mizoram BJP President Dr. K. Beichhua chuan, Mizoramah BJP chu mipuiin an ngana in an thinlungah a tla na tan hle niin a sawi.

Nimin khan Mizoram BJP hian an party office, Mipui Run, Upper Republic-ah Party kalphung leh Inrelbawl dan chungchang zirtirna leh infuihtharna workshop an nei a. State President Dr. K. Beichhua chuan, Mizoramah BJP chu mipuiin min ngaizawng tan mek a ti a, chak taka party a kal zel theih nan thawhhona tha te, inpumkhatna tha kan neihte a pawimawh a ni, a ti.

Dr Beichhua chuan BJP chu party lian tak a ni a, Inrelbawl na hi zir tham a ni tiin, party-a nihna chanvo hi lal anga rorelna tur ni lovin, hnathawhna hmanrua a ni, a ti. State President chuan Mizoramah tunhma lamin BJP nih zahthlak khawpin mipuiin min endawng a, mahse hetiang laia meichher lo chhi engtu hotu hmasate zahawm a tih thu a sawi bawk a, chutiang dinhmun chu kan kalpel tawh thu leh, Zoram kawng hrang hranga harsatna a tawh mekah Pathianin BJP chu Zoram khaichhuaktu atan a hman ngei a beisei thu a sawi bawk.

Workshop hawna inkhawmah hian National level-a Mizoram enkawltu, Pu Devesh Kumar chuan, State leh Tualchhung levea party kalphung leh inkaihhruaina hrang hrang a sawifiah a, party mite chuan pawl kalphung leh inrelbawldan hriatchian a pawimawh thu a sawi a, BJP chuan Social Media chanchin thehdarhna atan an chhawr tangkai thu leh mipui hmasawna atana sorkar scheme hrang hrangte mipuite hrilhfiarna atan hman thin a ni, a ti.

<><><>

SAFEGUARDING THE GIRL CHILD

Gauhati High Court Judge, Justice Michael Zothankhum chuan, State Level Multi-Stakeholders Consultation on Safeguarding The Girl Child chuan hmeichhe naupang humhimna kawngah hmasawna a thlen ngei a beisei thu a sawi.

Guwahati High Court Juvenile Justice Committee chuan nimin khan hmeichhe naupang te venhimna tura inrawnkhawmna State Level Multi-Stakeholders Consultation on Safeguarding The Girl Child a buatsaiha a.

Justice Michael Zothankhuma chuan Mizoramah a vawi khat nana hmeichhe naupang humhimna tura hmalakna buatsaih a ni chu hmasawnna pawimawh tak a nih thu a sawi a, hei hian awmze nei zawka hmeichhe naupangte humhim kawngah hmasawnna a thlen ngei a beisei thu a sawi a ni.

Social Welfare, Women & Child Development Minister Pi Lalrinpuii pawhin hmeichhe naupangte chu an inchhungkhur mai bakah sikulah leh khawtlangah thlamuang taka an awm theih nan venpui reng a tul a ni a ti a. Minister chuan Mizoram chu ziaik leh chhiar thiam tamna lamah India ramah a sang a, mipuite an vengva bawk tih sawiin hengte vang pawh hian hmeichhe naupangte humhim kawngah India ram hmun dang aiin Mizoramin a titha niin a hriat tih a sawi a. Mizo khawtlangah hmeichhiate an zalenin an vannei em em tih sawiin hetihruah hian hmasawn zel an la ngaih thu a sawi a. Hmeichhe naupangte an inchhungkhur mai bakah sikulah leh khawtlanga an himna chu sawrkar hmalakna bik tur ni lovin kohhran, khawtlang leh tlawmngai pawl hrang hrangte bakah zirtirtute nen thawhhona tha tak neih chhunzawm zel a pawimawh tih a sawi a ni.

He hunah hian hmeichhia te venhimna tur zirho zui a ni a. Thupui hrang hrang zirhona leh sawihona hun chu a kaihhnawih Mizorama sorkar department hrang hrang aiawhte kaihhruaiin hman chhunzawm a ni.

<><><>

LEAGUE OF MERCY

Vawiin August ni 24 hi Khawngaih tu pawl (League of Mercy) Pathianni a ni a, hemi pual hian nimin khan Salvation Army, India Eastern Territory pumpuiah hnatlangpui neih a ni.

India Eastern Territory-ah hian League of Mercy rawngbawlina hi kum 1994 August ni 1-ah bultan a ni a. Tun dinhmunah hian Corps 121-ah rawngbawlina kalpui mek a ni a, member 9848 an awm mek a ni.

League of Mercy ah hian Salvation Army member ni lo member engemaw zat an awm bawk a, khawngaih rawngbawlina a tui te tel theih a ni. A hnathawh pui ber chu tanpui ngai te tanpui a ni a, heng tanpui leh chhawmdawlina hna mai bakah hian mi 39 regular Sponsor an ni a, Missionary 21 chawm an ni bawk.

Kumin League of Mercy Sunday pual hian mahni hmun theuhvah tanpui ngaite tanpui an nih bakah Vantlang tana ke penchhuakin hnatlang neih a ni bawk a, Kawthler leh Vantlang hmun pawimawh te thenfai hna thawh a ni. Biak In chung rawngbawlina pawh he he ni pual hian buatsaih a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CM EKTA MALL

Chief Minister Pu Lalduhoman chuan nimin khan Ramchhunga thilsiam chhuahte pho chhuahna hmunpui- PM Ekta Mall Aizawl Chawnpui veng sak tur lung phum a phum.

Chief Minister chuan International Market hawlh phaka kumthemthiamte kutchhuak zawrh chhuahna tur a nih thu a sawi a, kum 2023-24 SASCI part 6 hmanga central sorkarin a rawn ruahman a nih thu a sawi.

Mizoram Ekta Mall-ah hian state hrang hrangin mahni state dehchhuah thil phochhuahna dawr an siam anga, Mizoram pawhin state hrang hrangte Ekta Mall-ah Stall a nei ve bawk dawn bawk tih sawiin Chief Minister chuan One District One Product, Geographical Indication Product leh kut themthiamte kutchhuak thehlarna leh zawrh chhuahna hmunpui a nih dawn bawk a ti.

State leh UT te stall tur 36 leh Mizoram district tinte stall tur 11, a vaiin stall 47 tal a awm dawn thu a sawi a, thalai mi 220 vel tan hna thar a siam dawn a ni a ti.

PM Ekta Mall sa tur hian Ministry of Health & Family Welfare hnuaia Public Sector Undertaking, HLL Infra Tech Services (HITES) te hman an ni dawn a, a enfiah hna chu IIFCL in Project Management Unit angin an thawk dawn a ni.

A changtu Tourism Minister Pu Lalnghinglova Hmar pawhin thu sawiin PM Ekta Mall tih awmzia chu inpumkhatna bazarpui tihna a nih thu a sawi a. Sumdawnna hmunpui tur, a awmna veng mai bakah Mizoram tana hmun tangkai tak tur a nih thu a sawi.

<><><>

PM Modi on Space developments

Prime Minister Narendra Modi chuan nimin khan India rama private sector leh startup-te (bul tan tharte) chu kum tin rocket 50 kahchhuah tumna neia hma la turin a ngen. National Space Day pual hian sorkar chuan chumi tihlawhtling tur chuan India hian theihna leh tumna a neih thu a sawi a. Space community chu sawrkar chu an ke pen tinah nghet takin a dinpui thu a hrilh a ni.

National Space Day puala video thuchah a thawnah Prime Minister Modi chuan, India chuan space technology chu zirna chuah ni tawh loin, nunphung chawikanna leh tih awlsamna hmanrua anih tawh thu a sawi bawk a ni. Space-tech chu India ram rorelna atana thil pawimawh tak a ni chho zel a ni, a ti bawk.

Space sector hian mel lung pawimawhtak tak a thleng tiin, tun hnai kum 11 chhung khan sorkarin space sector-ah hmasawnna tam tak a kalpui a ni, a ti bawk.

Prime Minister chuan Private sector-in PSLV rocket an siam hmasak ber chu kahchhuah thuai a nih tur thu a puang a. India rama private communication satellite hmasa ber pawh siam mek a nih avangin lawmawm a tih thu a sawi. Public-Private Partnership hmangin Earth Observation Satellite Constellation tlangzarh tura inbuatsaihna kalpui mek a nih thu a sawi bawk.

<><><>